

聖母聖衣會思諭

上海土山灣印書館印

No 842

聖母聖衣會思諭

上海土山灣印書館印

No 242

1000-8-35

MANUALE SODALITATIS B. M. V.

de

MONTE CARMELO.

—  
2<sup>a</sup> editio


上海主教惠重准

一千九百三十五年八月

第二版

## 弁言

或者曰：聖教公會中，其所立之諸會，雖其名稱各別，然究其立會者之意，則皆善也；故有一會，必有一會之利益，亦必有一會之恩赦；固其同也，寧有異乎？余曰：不然，諸會中之利益，有多寡之不同；諸會中之恩赦，亦有輕重之不一，正未可一概而論之也。卽余來中邦傳行聖母聖衣會，以言其利益多耶寡耶，以言其恩赦輕耶



重耶，若不一一詳述以著其書，俾人知悉，則斯會之利益恩赦，鮮有不謂他會，亦與斯會爲一也；豈能知其利益之多，恩赦之重哉！或又曰：此特子自讚揚斯會，故言其有多寡輕重之異耳，豈其然乎？予曰：吁！是何言哉？予聖衣會之利益恩赦，乃聖母求之，天主准之定之，聖母又從而親口許之命之，由是教皇欽承聖母之命，將聖母特寵斯會之恩，宣之於世，以示眾人，俾知斯會既蒙聖母許


爲之子，又許爲之弟，且親付聖衣，許賜無窮之福；則斯會之利益恩赦，曰多曰重，不亦宜乎？是以他會賢士，亦有多多讚揚斯會，見稱之於書者不少，豈容予私意於其間哉？況予膺揚天主及聖母之特任者，則宣傳聖母恩諭，仰充聖母鴻慈，實予職所當盡，敢不矢志竭力以圖報稱，重闡其恩哉！惟愧不達華文，欲書無詞，不能讚揚其萬一。所望善學者，知斯會最多利益，至重恩赦，敬承聖母

所許之洪恩，盡其爲子若弟之職，以敬事聖母，是則予之切望也！  
因弁之於首。

迦

天主降生一千七百五十九年聖若瑟瞻禮日泰西聖母會修士

那永福德修氏書



# 聖母聖衣會恩諭目錄

總論

一

原委

四

特昇聖衣尊貴殊恩

十五

會友爲聖母之子又稱昆弟

二十

聖衣爲升天之質

二十二

聖衣爲平險之具

二十四

聖衣爲永和之約

二十七

聖衣滅煉靈之苦

三十

佩聖衣通修士會內之功

三十二

諸般聖跡原因

三十四

聖衣顯滅火災

三十六

聖衣顯救水患

三十八

顯賜除病退魔

三十九

顯免劍戟銃炮之傷

四十二

顯賜絞犯不死

四十三

顯賜死者復生

四十六

顯賜拔救永罰罪人

四十七

述聖衣會格外恩證

五十一

頒聖衣會恩赦

五十五

受業儀注

六十一

修業總規

六十四

聖母七樂

六十八

跋

六十九



# 聖母聖衣會恩諭

## 總論

嗚呼！人生涉世，若客航海。航海之險，與涉世之險，其揆一也；但航海之險，人知者多，而涉世之險，人知者少。彼航海之人，一登於舟，則無不惴惴然者，知其有不測之風濤，有難防之盜寇，有莫保之舟覆人沒，故皆汲汲焉望登彼岸而後安。今吾謂涉世之險，亦若海然者，何也？蓋吾人生入斯世，一出母胎，亦如客登於舟，兢兢然必抵天國本鄉而後樂。然自原祖方命以來，人性被污，不特五司七情撓亂於中，聲色臭味紛投於外，尤有邪魔肆害，專務阻人升天；故昔聖賢比魔如海寇，常伏海濱，乘機突出，劫空靈財，俾舟覆人溺，沉於永苦之海者，蓋不知其幾也。嗟嗟！人欲望歸天國，而邪魔肆害阻止，使人

不得上升，反致下墮；以言其險，不尤甚於航海之險乎哉？奈何人猶自昧昧，若不知其險也耶？夫不知其險，必不畏其險；不畏其險，必不知急求善法以避其險，以平其險，其害可勝言哉！故余特來報爾福音，傳爾等之善法，俾知避其險，以平其險者也。又何畏其險哉！然吾所謂福音云何？經記先年天主將降洪水以罰世人，維時預告諾厄聖人，命製巨舟，令彼一家八口避患；至期，全入是舟，以故皆獲保存，無有一沉沒者。但斯舟之解，則曰吾聖衣會之像也。可知人入斯會，亦若登其巨舟，亦得保存以登福岸。蓋斯舟之廣大堅固，無有比擬，真能永存不壞者，是斯會也；且舵師精巧，智能無敵，又最精熟天堂之路者，是吾聖母；至若舟帆等具，則吾友所佩聖衣；而海程之圖，是又聖衣會本會規也。第海程之圖，至廣至急，蓋指明有山嶠淺灘一路之險；今

聖衣會規，亦指明天國之路，明解邪魔之計者。吾人守茲會規，以渡斯世之海，又何險之可懼哉？況聖母之名義，又曰海星，亦如渡海者，必仰南北二極之星，以正其路，使人得歸本鄉而弗爽也。今吾人日仰求聖母引歸正路，直抵天堂之福岸，豈不更徵其必升天而弗差乎？雖有風濤之患，有聖母以寧爾也；雖有跼蹐之苦，有聖母以慰爾也；雖有邪魔之害，有聖母以庇爾也；若是則吾人既入斯會，可知危險悉平，安然涉世，又何慮其升天之難乎？昔年有一聖女安熱辣，思慮升天之難，日切懇求天主指示善法，俾得天堂。一夕尤切祈主，主准其求，賜其神目忽見一梯從天到地，旁有本會二位聖人諭云：爾惟求入聖母會，常佩聖衣，必獲升天，毋庸慮也。安熱辣聖女一得斯諭，心中不勝忻幸，卽求入會，謹守會規，至其死候，果蒙聖母恩佑，獲升天堂。然

此其效也，類乎此者，又何可勝道哉？但吾友既知聖衣會，爲涉世之舟，又爲升天之梯，則當如諾厄之時，惟舟是入，以保其生命；又當以聖女爲法，惟梯是上，以守其會規，則幸甚矣。不然，有舟弗入，有梯弗上，則亦何益之有？故余甚願吾人咸入斯會，莫大堅固之舟，皆登斯會升天之梯級；知聖衣之寶貴，乃聖母親愛吾友爲子之據，佩之服之；知聖衣會之會規，乃涉世之程圖，升天之梯級，步之登之；仰承聖母特賜之洪恩，實取其益，則涉世之險自平，至終程余保爾必抵常生之福岸矣！

### 聖母聖衣會原委

遡聖衣會之興也，始自古教時，有先知厄里亞大聖，創興於加兒默羅聖山者也；故會友咸仰稱其爲聖衣會之宗祖。論斯聖之功德，固筆不能罄述，余

今亦舉其概焉而已。厄里亞先知大聖，是天主留其在世，迄今猶在樂土居之者。當其離世人時，乃天主命天神以火車火馬駕之而去；俟斯世將滅時，天主再令其復回於世者。然從昔至今，人莫知其何在，惟度其必有時復現於世；所以如德亞國人，當吾主降生於世時，人見其聖德奇異，不知爲誰，多有疑其或爲厄里亞大聖復回於世者。由此觀之，其功德隆盛，人鮮能及，可知之矣。不然，吾主至德至聖，豈人可幾及而可漫爲比擬之乎？要知斯聖之功德，人鮮能及之者，實由其愛主愛人之心無以尙之。惟想顯主之光榮，異端之消滅，感動罪人悔悟，是其心之切切不能一日去諸懷者。故其時見亞哈伯國王迷失真主，惑於邪魔，聖厄里亞卽直言諫諍，且預示之以罰曰：王之慝甚，招主義怒，其罰定矣；非由我言，雨必不降，露亦不潤爾地。王終不悟，

後果應其言，三年不雨，通國飢荒，苦不可言。聖厄里亞因憐其民之苦，乃登加兒默羅聖山，稽首求主，速賜甘霖，以甦民困。時主卽准其求。忽見從海而上，有一片異雲，其形如人，油然布滿於天，沛然雨降於地。斯時大聖蒙主特恩，果由其言而雨乃降。又蒙天主默啓，俾預知將來天主降生，揀選一童貞女爲母，更蒙天主賜其神目，使見聖母至潔無瑕，不染原罪之像。維時厄里亞大聖感激無似，忻喜無任，乃集其同志善友，於加兒默羅聖山立會，奉其虔心，恭敬無原罪將生之聖母。故曰聖母聖衣會由來已久，蓋其初實肇基於此也。

迨厄里亞大聖功業已就，主命天神令其騰空去後，又有厄里叟先知大聖，敬承先聖所傳，竭力贊揚斯會，始則行之於加兒默羅聖山，未幾又傳播於

鄰國各處，建立會所甚多。踐阨里亞及阨里叟聖祖之踪跡者，亦復不少。迨天主降生，古教已亡，聖教新立，主命宗徒廣行敷教之時，斯會之友，一聞其道最真，又見其行甚異，莫不信從領洗入教；宗徒亦愛本會友真誠，從教熱心，且識其才德出眾，遂願挈之爲伴，用其相助行教；故本會友此時卽得親炙聖母德容，謹聆聖母懿訓；聖母亦屢登加兒默羅聖山，頻垂顧問，且教之誨之，輔之翼之，真不啻爲斯會友之師，而又爲斯會友之母也；故本會友益加奮勉，無不日進於道德。

至聖母升天後，會友依戀情深，卽於加兒默羅聖山，立一小堂，敬奉聖母。此堂雖小，究其立堂之處，乃當年大聖阨里亞見發顯異雲爲聖母無原罪潔淨之表，卽於其叩求雨澤之地，建立之也。且立是堂，又係本會肇開天下恭

敬聖母第一座聖堂。

至論此會友立堂之後，敬事聖母之心，倍加虔切，真寢食不忘；故又爲眾口齊聲贊揚，咸稱本會友是爲聖母之昆弟者。於是至今本會仍被眾稱聖母昆弟之名，奉以爲號。但斯昆弟尊稱，匪獨出自眾口，卽歷代教皇，亦明示證據，准定本會斯名之稱，許會友奉之以爲號也。顧其時，猶有不知而議爲僭妄者，若不敢聞斯稱，計圖阻止本會之尊號；豈知反助本會斯稱之顯名，亦若風鼓其舟，使疾抵岸，似害之而實益之也。當時泰西昂里亞國，一府遭難，各修道會，俱到城內街市遊巡，籲禱天主垂佑，見有一尊石刻聖母像，本會友見之，皆俯首急行拜禮，展其愛敬之心，不料此聖母石像，亦卽低頭回拜，且見其像伸出右手，當各會修道眾人前，指本會友而言曰：斯真實爲吾之



昆弟也！如此洪恩顯證，若雷貫耳，莫不驚聞。由是國內國外，咸知聖母親定本會爲聖母昆弟尊貴之稱，故樂從聖母之聖會者不少。

雖其後屢遭回國之害，會友致命者不知其數，然恒蒙庇佑，任其肆虐，益顯聖母保護奇能。惟彼回國，當年將欲盡滅聖教之時，聖母預知此難之近於五十年前，先曉諭會友，當徙泰西聖教地方，於彼處多立會院。然數百年前，雖有本會會友在西國精修，但其時修士尙少，其仇亦多；且本會修士喜於居靜，寡交世人，故本會之名光，在西國猶未大顯。迨天主降生後一千二百五十年，有拂耶濟亞國類斯聖王，時念教眾居於回回侵佔之國，其苦甚大，又念被佔之國，乃吾主耶穌聖足遊巡之地，且以寶血潤之者；況其中有聖誕之府，苦死之山，聖尸之墓，今俱被回回竊據，不復爲吾聖教所有，朝拜不

能瞻仰不得，哀痛之至，義勇赫然，遂親率大軍征討。於是聖王駐蹕回國五年，乃得屢登加兒默羅聖山，得見本會修士盛德，聖王卽忻喜無已，每見本會友，則敬之如聖，因請本會友幾位修士，同歸西洋聖王本國，許其立會院精修。會友欽承王命，同到本國京都，蒙聖王加意敬禮，格外優待，且將所居之府立爲修院，俾修士居之，又將朝內寶庫珍藏至貴之聖物，如茨冠鐵鎗、殮布等項，俱令一一供奉於本會聖堂，又自親求入會，以彰本會之尊貴，以顯其愛本會之真誠；故其時聖母會之名光，乃大顯著於泰西諸國，到處會院林立，其尊稱昆弟之名，亦遐邇流傳；願進斯會者，更不可勝數。

但初時於西國傳行未久，又遇其仇妬恨，總因斯會之德光炫耀，彼仇如瞋目者，不勝太陽，故反恨其光耳。是時仇黨竟密奏教皇，祈滅斯會；孰知反加

斯會之恩，更助斯會之固。於是夕聖母卽顯容於荷諾畧第三任教皇前，明令其不但保存斯會，猶當多多加恩於會友，教皇一一如命奉行。

其後又有聖西滿斯多克在昂里亞國，值聖母聖會，亦慮仇妬常謀加害，無時不求聖母庇佑。乃至天主降生後一千二百五十一年，聖神降臨瞻禮之日，聖人預知大患將來，益加乾惕，愈切懇祈聖母本會之主保，望施格外特恩，以旌其會而保存之。正祈禱間，忽見天神護擁，聖母從異光中顯現於西滿聖人之前，手執聖衣一件親付之曰：吾親愛之子，領此爾會聖衣，永爲余會標記，使眾共知爲余親立斯會之印證，並俾爾及眾友咸知此聖衣是賜爾輩爲升天之質者，爲平險之具者，亦爲永和之約者也；若至死能善佩予所賜之聖衣者，予必降慰其靈，救其升天，免其永苦之火。如此恩諭，言畢不

見。時西滿聖人既親承聖母盼睞，又蒙賜斯莫大之寵，且俾會友皆得躬佩聖母自天親送之聖衣，其爲喜慰慶幸，洵莫有踰於此者矣！況得此聖衣之洪恩，而聖衣會之尊名，更洋溢於外。無論臣庶，願入斯會，卽帝王皇后，鮮有不求入聖母聖衣會者也。至若聖衣之寶貴，人人皆重視之，無有敢輕忽褻慢者，因知是聖母從天親送之衣，大發其愛本會之至情，以貴其會，以加其福，以拯其危難者。種種隆恩，非一言可盡，不得不另自具載。

但人有福德，毀來謗興，世所不免，若聖衣會所恃聖母聖衣之特恩，任其仇妬圖謀陷害，而本會恒光，不能損其毫末，反更受聖母無限之恩光。昔有聖伯多祿鐸默爲本會大主教，常求聖母賜斯會到末世恒存，勿容其仇讐妬害。乃蒙聖母親慰之曰：伯多祿爾毋容慮也，爾會之宗祖厄里亞者，曾求斯

恩，而余子耶穌業已准其求矣，爾曷慮乎？噫嘻！大哉斯恩，真無窮之恩！幸哉是會，實無終之會！故云，欲滅太陽之光難，欲滅斯會則愈難也。然會之興不難於始，而難於終；亦不難於終，而難於始終如一，永久弗替也。蓋始必興盛，至終則衰者多矣。惟斯會也，始自先知厄里亞大聖興之；繼則聖聖相傳，約有二千六百八十餘年；若以年計之，則振古如茲，不爲不久矣，而能興盛始終如一，永久弗衰者，謂非聖母之洪恩，而能若是乎？

但此會修規最嚴，苦行亦常且重，惟會友初因熱愛切於衷，故皆忻忻然樂從其苦，不畏其嚴。及其後忽有人焉，謂斯會之修規過嚴，恐人力不逮，難勝其苦；乃竟請命教皇乞寬其規，而教皇亦遂准之。以至斯會之原光若蝕，盛德幾衰。然幸僅歷一百三十年，卽有慧女聖德肋撒爲是會又從而振興之。

緣聖女自幼極愛聖母，聖母亦常賜之寵佑，故其入聖母聖衣會後，毅然循其嚴範。每念聖母聖會原定精修之規，雖嚴且苦，然要皆聖母默牖先聖以定之者；奈何會友不承先聖之規範，仰承聖母之恩諭，乃妄求其寬耶？聖女之心切念不忘，卽矢志從中勸化；先自苦已甚嚴，隨又勉勵屬女，惟願皆從其表，復苦修規；其苦其嚴，勿畏勿慮，黽勉行之，自有聖母扶持默佑。此聖女之言，真若從巨火炎炎發出，不得不感炙旁人之愛。於是樂從其善表，悔其寬悞，爭自濯磨，復守嚴規者，無計其數。夫女會旣已復興，則聖女之心，宜其慰矣；奈男工尙然未振，而聖女之志不忍翹然，總由其愛火不熄，如又增薪，其熱愈烈，欲罷不能。但聖女亦知斯工不易，惟恃全能者之力，托聖母恩施，直啓斯工，盡心行化；奈奇功晚成，良久未效，不勝急切。又幸值聖若望係同

會同志之士，其熱愛之心，與聖女之心亦若一焉。旣聞聖女志意相同，忻喜之至，卽願協同竭力興工，振舉聖母聖會。於是同聖女建立會院，廣招士庶，勉勵苦修；未幾德光大著，而本會修士亦多棄寬從嚴。斯時聖女德肋撒，又創建嚴修會院，共有三十二所，似此浩大工程，若以人力爲之，豈易爲哉？況聖女自幼卽謝俗棄財，甘貧苦行之人，而一旦創此費大用繁之舉，其功豈易成耶？且其中猶有邪魔妬恨，於其將立首院時，則百計圖謀阻間其功，不使成其善舉。維時聖女亦恐其功不成，幾萌退志，幸賴聖母偕聖若瑟忽來顯容以慰之曰：吾女斯工之興，甚樂我心，旣至半途，勿廢前功；汝宜奮勇直前，勵行振舉，吾必助汝成之。又吾主耶穌亦屢顯諭聖女，令其急興苦修會院，且許其會院，將來必致射光如星，燦爛於天下，勿慮其靡，自有聖母偕聖

若瑟保護汝立之會院，卽余亦樂居於會友之中。時聖女恭聆三聖恩諭，感激既深，堅心益固，遂奮力創興，甘受萬劇，竟成萬世不朽之功。會院一一告成，不但感發會友之熱心，謹遵斯會始定之規範，聖女外又另加數倍精修之苦行，亦無不樂從其所加之善規。由是聖母聖會原光又復大顯，賢聖相傳道德之盛，亦始終如一矣。然此皆聖女與聖若望上承三聖之恩，故能振興斯會之靡。若論聖女與聖若望其所盡之力，所受之劇，所積之勛，筆亦難以備錄。惟斯會至今無不仰敬二聖，爲斯會之再祖，謂其復立聖母聖會，以成此莫大之功者也。

惟是斯會，非獨今世蒙聖母庇佑，以萬恩常加此會，凡在斯會之友，於其逝世之後，聖母亦必親垂顧之，救斯會友之煉苦，速賜其靈魂，俾得早升天國。



此恩乃聖母當年親口所許，故教皇遵諭亦准定之。茲亦畧述其由：天主降生後一千三百一十四年，格肋孟德第五位教皇崩時，紅衣宰相公同推立以接其位者，因不相符，故遲疑不決，接位無人，歷二年之久，聖教會中虛其首焉，以致聖教諸國，皆不獲太平。其中猶有乘此僞竊其位，而自立爲教皇者，更遭其淆亂，不得安寧。幸有一位紅衣宰相，才德不凡，自幼切慕聖母，見聖教如此大患，心中難忍，乃求聖母轉求天主，俯憐聖教窘難，速賜教宗平定斯亂；是時聖母卽准其求，且見躬服本會修衣，顯容以慰之曰：視余代求，吾子已准，卽賜爾將登教宗之位，勿驚其仇懟，自有余以救濟也；但爾當報斯恩，須重視余之聖會，亦須重加恩於會友，自今而後，爾旣代余子高位，統理教眾，凡入吾聖衣會者，若生前勤守會規，至死後或入煉獄，余必降慰減

滅其苦，每逢瞻禮七日，余定携之升天；此恩吾子已定之於天，爾亦宜允之於地也。幸哉吾聖衣會，蒙聖母賜此特恩，故其原文則謂瞻禮七日之聖旨是也。當日聖母明顯恩諭之後，未幾彼紅衣宰相果登其位，稱之若望第二十二位教皇；於其卽位後，則降聖旨，自證聖母面命親許，特賜聖衣會至重至大之恩，命准之定之，傳之於地，亦如聖子耶穌因聖母之功績，而早已定之於天焉。所以聖衣會友，凡遇患難險危，生前死後無不悉荷裨幪拔濟。又蒙歷代教皇愛慕聖母，亦倣效其寵愛斯會至情，故屢頒種種恩赦，猶有另賜格外特恩，並聖衣所顯之奇跡，今俱畧述於後。惟願人人知聖衣會之原委，識聖衣會之尊貴，共沾聖衣會之利益，是則余著聖衣會規之意也云爾。

論聖母特昇聖衣尊貴殊恩

聖教公會內，論聖衣會之尊貴，匪獨謂肇立斯會者之聖榮，與時之太古；卽斯會所受之利益，所頒之恩赦，其多且重，亦實顯其爲尊爲貴也。況斯聖衣，乃聖母自天親送之者，備載萬恩，以證斯會獨爲其所愛之重乎？亦如上古性教時，有雅各伯聖人，獨賞其幼子美麗之衣，亦以明證其幼子爲其所愛，非若愛他子之愛一也。又經記上古若瑟聖人，有昆弟十人，欲表其愛，乃各授之以常衣二件；惟其弟名本亞敏，當冲幼之年，尤爲若瑟所愛，故又特授其華衣有五。夫古聖若瑟，乃聖母之像也，其兄則眾人之像，其弟則指斯會友之像也；卽此可知聖母爲萬民之母，凡爲之子者，固無不愛，但愛有顯其同也，亦有徵其獨也。所謂同者，聖母於眾信者，皆錫之以神衣二件，是則聖母常行提佑於生斯世者之苦難，及其常保護於去世者之危險；如聖若瑟

愛其昆弟，授之以常衣二件是也；然此皆所同得，無以異也。至所謂獨者，聖衣會則蒙聖母異寵，又賜之神衣五件；亦若聖若瑟獨授其幼弟華衣有五件一也；故所謂獨，靡有同也。若是，則聖母所賜聖衣，明徵其愛之甚切，超越尋常萬萬矣，其可忽乎哉？然所謂神衣有五，要皆異寵殊恩，不得不詳述於後。

### 聖母賜會友爲之子又准爲昆弟之稱此神衣一也

夫聖母旣爲諸會衆人之母，可知教中諸人，亦皆得爲之子，寧獨聖衣會云乎哉？然自聖衣之錫，乃知聖母之愛，雖爲諸會之共母，又獨爲斯會之慈母，其親愛眷顧之情，則實遠勝其爲諸會之母也；緣聖母授聖衣於值本會聖西滿時，聖母稱之爲子，又自證其爲斯會友之慈母。以故額我畧第十三位教皇，重念斯會之恩，乃宣諭褒揚，謂斯會之生養，是由聖母神胎而產之，亦

由聖母神乳而育之。可信聖母實爲斯會之慈母；斯會之友，又實爲聖母所親愛之子，洵不虛也！然異哉斯恩，聖母賜斯會友得陟爲其子之位，是舉他會萬難希冀之恩，而聖母獨加於斯會，非自明證斯會之友，獨爲其愛之重乎哉？昔有多瑪斯聖人曰：天主聖母之稱，其尊貴真無敵也。蓋言世上無子得比吾主之尊貴，則亦無母得比吾母之尊貴。今吾友幸進斯會，旣蒙聖母寵異之爲子，則其尊其貴，又孰得而同之？況聖母篤愛斯會，猶恐其愛有弗盡，匪獨錫吾友居其子之位，且又賜吾友爲姊弟之稱；此其故何也？蓋母子之稱，其親親固重，而名位則嚴；嚴則自生其畏憚，恐吾友斷其所求，失其所望，故又不若姊弟之稱，更增吾友之親愛，更便吾友之祈求，更堅吾友之仰望；此聖母又許爲姊弟之稱，見其用心眷顧，全注於斯會也如此！噫嘻，是何

幸哉！親之爲姊，又倚之爲母；則吾主耶穌，吾友豈不能托賴奉之以爲兄乎？於將來審判之時，吾主又爲吾兄，豈不能仰求看聖母所鍾愛之子，矜憐吾友，爲其手足之情乎？格外施恩，寬宥吾友，有必然者，又何患乎？是昔有賴瑙多係耶穌會士，驚訝斯恩之妙，則曰：難詳斯會之恩，欲比無比也，欲書無詞也；亦惟曰：廣哉聖母之愛！幸哉，斯會友之尊而已矣！

### 聖母恩賜聖衣許爲升天之質此神衣二也

世人皆願升天，但不能知其必升乎否？所可知者，人一離世，若弗上升，必然下墮而已。故人無不恐懼怕死，由其不得將來一定升天之據也。若聖衣會則可以無懼：緣聖母當日賜聖衣之時，親證其爲升天之記號；又親許吾會友，至終能善佩聖衣者，必免其永苦之火，俾獲永享天堂之福。可知聖衣，乃

聖母明付吾友爲升天之質者，吾友何幸而獲此殊恩哉！但斯恩至重至大，吾友須朝乾夕惕以承之；毋自謂我已成聖衣會矣，聖母許吾一定升天，則或干違規誡，諒亦決不棄余。噫！若吾友或作是想，豈但辜負聖母特賜之恩，不能上升；亦適見其甘於自棄，必爲下墮之人而已。蓋聖母最愛斯會，故特賜之聖衣；是以助吾會友日進於善，俾易行天堂之路者，寧使吾友退於善，而迪於惡者耶？試觀吾主當日建定聖體大禮，曾許之曰：領聖體者，必獲常生，不能再死；奈何有茹達斯惡徒，實領主體，魔猶鑽入其心，致其自縊而亡，其靈魂永墮地獄，此豈主許之言不實，抑聖體無能力以救之耶？皆非也，由其冒領之罪，自招主罰故耳。若是，則凡願升天，必先守誡；卽凡得聖母所許爲升天之質者，亦必勿負與聖母互約；因聖母許吾必登天國，吾亦許其必

守會規；若果能實踐其約，竭誠敬愛以悅母心，自必爲聖母所寵，不爲其所棄矣。昔有安瑟兒末聖人有言曰：人爲聖母所棄者，必亡而降；爲聖母所寵者，必存而升。又聖老楞佐儒斯弟尼盎亦云：凡篤愛欽崇聖母者，必將常生，永不離於天主臺前；因聖經贊頌聖母爲上天之門，諸福賜悉所由出，諸善歸悉所由入是也。故聖賢謹約聖經之旨，恒云：敬慕聖母之誠者，將爲福者之號。矧斯聖衣，乃聖母愛斯會友，敬慕其誠，故特賜爲升天之質者，豈但將爲福者之號乎？

### 聖母賜聖衣亦爲平險之具此神衣二也

稽古撒洛滿國王，蒙主聖寵，賜其預見聖母奇妙功績，王不勝贊頌而謂之勇女；爰列其勇要，於厥妙功間，揭其最忻勤者，預備家屬人之衣服，乃紡乃



織，尋氎覓緼，急製其衣，俾家屬人人俱衣重衣，以禦嚴寒。時有聖賢解斯喻曰：夫所謂聖母家屬者，乃指誠切恭敬聖母之人，其恒心敬愛，故甚相熟，直若一家者焉；至其所謂重衣者，是謂人生時，蒙聖母寵佑神衣，並逝世後，所得榮光福衣。今以斯會而論，既爲聖母之子，又爲聖母之弟，豈非確屬聖母一家之人乎？且據聖賢解喻，亦明指入是會者，竭誠奉事聖母，愈親愈近，不間不離，視他會與聖母之相熟，其實相去遠甚。蓋斯會從古卽創建天下第一座聖母堂，以恭敬本會之恩母；迨其後又舉行第一個慶賀聖母始孕無原罪之瞻禮，而宣布其奇妙厥功；且蒙聖母生在世時，又屢降斯會院，顧問斯會之友，爲師爲母，沐其教養之恩；至其升天之後，又復親賜聖衣衣之，俾斯會友，生時獲聖母寵佑神衣，死後又獲榮光福衣；若非聖母視爲家屬，其

眷顧有如此哉？觀彼撒洛滿預言聖母所製重衣，及後聖賢明解其爲一家之人所服；今斯會果蒙聖母親賜聖衣，不亦相得而益彰乎？卽彼所謂重衣以禦其寒，亦卽表斯聖衣，能禦其神形之險，護其生世之安，且卒以保其友之神命，全其德以進其福也。獨是聖母聖衣，平險之能力，所顯奇跡甚多，不能悉述。茲惟引述，昔有他會名士，曾有言曰：斯會之聖衣，聖母賜畀之時，其所許之恩，常見其效驗，無一不應；故多有善人，屢聞邪魔，空中哀號，怨斯會之聖衣，大敗渠國；亦常於渠手，奪出人靈，不可勝計。可知斯會之友，或被三仇誘惑，陷於犯罪之險，而仰賴聖母聖衣，以破魔計，脫魔手者，蓋不知其幾也。緣斯聖衣，是吾人形神之堅鎧，魔器雖利，決不能攻透所佩之聖衣故耳。至若渡海而遭風波之險，有仗聖衣以平之者；遇火焚燒之猛，有仗聖衣以

滅之者；生產艱難，有仗聖衣而變爲易者；尤有人已死亡，亦獲聖衣之能力而令其復活者；諸如此類，其顯迹又何可勝道哉？故斯聖衣，凡佩之者，無時無地，不受其幘幪；或凶或險，皆蒙其拔濟；佩之則安，不佩則危，不誠然乎？

### 聖母賜聖衣亦爲永和之約此神衣四也

蓋人必和於主，斯可望歸於天；然和於主，正不易言也；倘其間不得聖母主保，代爲乞和，吾未聞有能得之者。所以人欲求和於主，必先求和於聖母；若得求和於聖母，爲聖母所愛，不爲聖母所棄，卽主判雖嚴，而有聖母爲之和解，斷無有不蒙主矜憐，賜歸天國者也。但求和於聖母，亦必得其允和之據，始可以免疑慮；今求其得聖母允和之據者，則惟吾聖衣會，久已得之。於古則有徵其互約允和之像焉；經記達未德聖王，於其未卽位之先，爲國家出

力其勇德超羣，爲約納達太子所愛，因互締爲友，相愛甚篤，直若一人。時約納達又解己衣衣之，以表其親愛之確據；且互相約盟，達未德許保護其尊榮，約納達許振救其諸患，彼此相助相顧，永矢勿替焉。夫達未德與約納達當日之盟約，要知是則表吾聖母與斯會，互結永和之像也。緣聖母許保斯會以長存護庇吾友，真如赤子，不離其懷抱；吾友亦許保聖母之榮名，敬愛聖母實如孝子，欽承其教育；彼此敬愛，總無缺失。故斯會，人皆知爲聖母心乎愛者；亦知斯會之友，敬慕聖母爲至誠者。如此相得益彰，所以相約永和之特恩，猶有足徵其實據，於聖經所記：上古天主以洪水罰世人時，僅存聖諾厄一家八口；及降罰一畢，乃命其一家，復居陸地；主又降福慰諭而言曰：余今與汝偕來裔契約，自今以後，不復以洪水殄滅人類，乃立虹霓顯於天。

上，以爲永約之記；蓋謂彼霓一現，主怒自息。以故古來聖傳，咸指聖母爲上天之虹霓也；謂聖母旣爲救世真主之母，則其救人之權能，自然無可比擬；況又立之爲兆民恩母，其仁愛之心，亦自然無所不旻也。由是思之，可知斯會，旣蒙聖母相約，許爲永和之特恩；卽斯會之友，或有不謹而偶陷於罪惡，引主當刑之險者，若卽仰求本會慈母格外垂憐，代祈寬宥，雖曰已爲聖母之罪人，失其歡心，負其恩佑，未必能獲聖母矜憐，然所恃躬佩聖衣，是爲聖母所賜者，不妨藉此直求聖母，乞看所賜聖衣，爲永和之記；雖余小子，失所約信，獲罪於母，第今追悔痛心定改，再不敢稍負所約，必盡本分，悉踐所許，伏望聖母，顯若虹霓，以息主怒，免余罪罰，是則余小子之切望也；如此懇求，吾知聖母睹其聖衣爲永和之約，寧忍弗救之哉？自必顯其如虹，以息天主

義怒，而救其子，置之於永和安所也，必矣！噫嘻！聖衣之庇佑，其所爲益於人若是；宜其無不驚訝其能之奇，深信其爲永和之約也。幸哉吾友，獲佩聖衣，受茲殊福，感佩當何如哉！

### 聖母賜聖衣又許滅煉靈之苦此神衣五也

論斯會蒙聖母所賜之恩，真無其數；然顯其至愛，無有過於此會者，則莫切於死後，聖母降臨垂救斯會友之恩，爲至重至大也。蓋吾人生前之苦難，總不若死後之苦難，爲更劇耳。彼時人力已盡，萬不克自振拔；正如繫獄者，欲出無門，不能納贖，以償生前所負之債；又不能自建功德，以邀赦宥之恩；亦惟直受其苦，以待其罪之滅，罰之滿，而苦斯息焉已矣。況人死後，若入煉獄，其苦又有輕重久暫之不同，亦因人之罪有多寡大小之各別，故有應煉至

千百載，始能出其獄者；但斯煉靈之苦，不分久暫，皆所難受。古來聖傳，謂人入煉獄，雖令其受頃刻之苦，亦遠勝受現世一切萬刑之苦。噫！甚矣哉，其苦也！茲何幸哉！吾人得入斯會，蒙聖母賜斯重大之恩，親口許吾人生前謹守其會規，死後或入煉獄，聖母必親臨降慰，以救其友，以滅其苦；且定至逢首瞻禮七日，必携之同升天堂；此聖母煌煌恩諭，無不驚奇，知斯會爲聖母所重愛，洵無有過於此者，誠哉是恩也！況此恩赦，非由於地，實出於天；自天上天主立之，聖母祈禱之，聖子俞允之，聖父又從而定之者；故聖母親降斯恩，令教皇准而宣之於世。是望吾人知聖母賞斯會之恩，惟其所獨，顯其愛斯會之愛，靡有所同，始終成全，不遺餘力，以展其愛之至，昇斯會之益無窮耳。卽斯會友，仰承聖母無數洪恩，亦全藉斯，賜救煉靈之恩，以樂觀厥成焉，幸

何如哉！

茲述佩聖衣者亦通修士會內之功

蓋聖衣修會，有如一體；緣聖母欲傳於眾，共沾聖衣之恩，故公會定規：凡有室家，不能絕俗精修者，但躬佩聖衣，守斯會規，亦與會中精修之士，共成一體，而通斯會之功焉。亦如人一體，四肢百骸，但一有受益，則全體均受其益；斷無有一之或遺，而不獲受其益也。然所謂聖衣會如一體者，其首云何？聖母是也。其項云何？古教先知大聖厄里亞是也。至論其有四肢，則先知大聖厄里叟及聖若翰保弟斯大聖女德肋撒及聖若望是也。故凡入聖衣會，而能善佩聖衣者，亦皆以成其百骸，而與斯會成爲一體焉矣。夫旣成爲一體，則通斯會之功，豈不然乎？獨是斯會之功，至多至大，無論聖母爲斯會之首，



其所積之功，概諸天神及諸聖人，從生至終所建之功，較之聖母，猶滄海之一滴，萬萬不能比擬；卽爲斯會之項者，厄里亞大聖，與夫爲斯會之四肢者，大聖厄里叟，及若翰保弟斯大聖，圣女德肋撒，與聖若望，其功亦難以並述。惟以聖若翰一人所建之功而論之，亦遠邁於諸聖之上，而其功不可勝述，又奚能紀其萬一哉？況此外斯會中，所成之聖人聖女，更無其數，亦有他會博學修士，曾證其多而云：誰能數天上之星辰，方可計斯會之賢聖；豈非明證斯會之聖人聖女，其最多乎哉？是以考之史傳，自新教始興，至一千二百六十年之期，而斯會中，計其爲主致命以成聖者，有十四萬之多。至論本會修己與化民以成聖者，更不可勝數之矣。總因斯會之興，匪由人力。昔亦有賢士云：斯會是天主簡選之會，用以宣布天主，及聖母之尊榮者也。故斯會宜

其布滿天下各國，建立會院甚多，亦宜其賢友無數，咸以嚴修之苦，德化之功，而多得登聖人之域，有何疑乎？況當年欽奉西斯篤第四位教皇詔告，亦謂諸精修會間，獨斯聖母聖衣會友，其德光若持明燭，爲聖德及愛敬之光儀也。由是觀之，則斯會所貯之功庫，富矣哉！無有過於此者，可知之矣。且無國不有，無功不立，又日日以增其功，皆歸於會內，正所謂取之無禁，用之不竭者，是斯會之功也。吾友旣入斯會，又得通斯會至多至大之功，日增其神益，幸何如哉！

### 論聖母聖衣恒施諸般聖跡之故

從來所貴乎聖跡者，乃三德之因也：固人之信，立人之望，篤人之愛，要皆聖跡之力焉。以故天主降生於世，敷教時廣行異跡，如命瞽者視，聾者聽，瘡者

言，攣者舒，跛者行，癩者淨，與夫病者死者，無不應聲而起，斯何故也？蓋主示之以異行，乃爲救世者之真證，使人發信望愛之真切也。然亦不但主行如是，卽耶穌升天後，其宗徒徧行傳教，亦無不倚主全能，多行奇異，大顯其聖跡，以證其教之真且實焉。若是，則聖母所賜聖衣於斯會，欲顯著其所許之恩佑，而恒施聖衣之聖跡，護庇吾人，以堅吾人信望愛之德，不亦宜乎？獨是聖母聖衣所施恩澤，其多無數；人欲悉記，亦如人進大海，不能不驚訝以自退也，豈能悉記聖衣之聖跡哉？今予欽述聖衣會聖母恩諭，並述所施聖衣聖跡，亦不過於萬千中，畧提一二，聊以助我同人信望愛三德之意焉耳。惟願我同人，知聖母所賜聖衣之大能，與其寵愛吾會友之至切，常發其信望愛，欽崇聖母恐後之心，永獲聖母聖衣之福佑於無窮焉。斯樂甚矣！斯幸甚！

矣！

### 茲述聖母聖衣顯滅火災之奇能

天主降生後一千六百九十四年，意斯巴你亞國邊界，有名城責烏達者，立之以攔外寇。時值鄰邦回國帶數萬兵來攻其城，正攔護之間，忽見城內貯火藥倉房失火，幸眾趨救撲滅。此時將軍令下命查，或有被火傷害之人。查明有一位武士，不見其踪跡；眾想其必殘埋在頽牆之下，不復救其活矣。不料忽聞城下有聲，再三哀告云：吾乃奉教之人，休傷害予。眾聞其聲，乃知其係不見之武士，因卽下梯扶之登城。見其赤身無衣，皮肉被火皆燃，獨其項下之聖衣，見其完好，並未焦傷。眾視之莫不驚奇，乃問其故。武士答云：緣斯火藥猛暴，直拋我於外寇之寨，自知將被其殺害之險，勢難逃脫，又慮積功

甚微，況有所犯之誠未解，奚能逃主嚴判？於是懇求聖母垂憐，看吾所佩聖衣，寬延我命，俾得告解以終幸矣。如此禱畢，果蒙聖母便將我身移置於城牆跟下，得脫敵人之手。眾聞其說，知其故，無不感謝聖母洪恩，賜斯聖衣奇能福佑；卽爲之趨請司祭者，容其告解救之。然斯武士神工畢後，尙自料理家務，親寫其遺囑，付之後人，乃泰然而卒。

又有歌兒別拂郎濟亞國郡城內，忽遭火災，火勢又極猛烈，人力竟弗能救；眾心慌忙，急請鐸德，恭請聖體，降福火災；果見聖體一至，其火遂止。未幾他巷居民房舍，又復起火；斯時幸遇聖衣會一友至，止見其火勢凶猛，遂將身上所佩聖衣，自解擲之火內，祈聖母憐免斯難；亦見聖衣擲下，其火立熄。隣近房間，皆獲保存。且踰時從火中檢出聖衣，依然如故，無焦傷焉。

### 聖母聖衣顯救舟沉人溺之水患

天主降生後一千六百五十二年，有巨舟渡西海，忽起大風大浪，以致舟沉，人胥溺焉，哀哉！已逾三日，忽見一婦人懷抱乳子，竟從海中飄來，直登岸上。立壘者見之，皆大驚異。及眾聞之，亦皆趨前視之；因詢其落海已越三日，何故得不死於海耶？斯賢婦乃嘆泣而感頌之曰：非我人力所能免也，是惟聖母聖衣之庇佑。予時見猛風四作，巨浪滔天，知其舟必顛覆，予亦自擬必死，悚懼不已，惟有仰仗聖母聖衣救予，故一覺水入吾口，予即將聖衣塞入口中，一心懇切托賴聖母救援，果蒙聖母提佑，予三日在海濤之中，總未沉底，且得仗其浪湧，直送投於海濱，俾得登岸，實皆聖衣之能力，以救予不死者也。對眾言明，無不爲之感謝聖母之恩焉。

又有里翁係泰西名府。去時未久，有一婢女，夫家聘定之後，尙未婚配，而其夫則深嫉之。一日其夫伺其女出城，行至河濱，乘間無人，卽取其所佩之刀重刺其女，又復推之於河；且見其女身浮不沉，恐不能致之於死，猶用巨石壓之。豈知此女躬佩聖衣，有聖母護佑，於惡徒去後，此女竟自出身於河；且自上城，至其鄰宅。人一見之，莫不駭然；因見其徧身泥污血染，無數重傷，如何能不死於河，還能自己步走上城，咸問其故。此女答曰：皆聖母聖衣是佑，因我被刺擲河之際，我一心只仗聖衣之能力，切望聖母拔救，勿令我不獲解罪以死，而墮冥獄，如此云云。聞者感嘆不已，卽爲之急請鐸德，俾獲解罪，亦安然而卒。

### 聖母聖衣顯賜除病退魔之能

天主降生後一千六百二十年，熱兒瑪你亞國各洛尼亞府，有世家一人，年久臥病，諸醫罔效，總弗能愈，自度末期不遠，卽請本會神父以備終規；神父至其家，果見其病篤垂危，乃慰之曰：善友勿憂，余已帶來良藥，可並治神形之疾，汝願服否？病者問斯良藥爲何？神父曰：余所佩聖衣是也；汝若願領聖衣，堅望聖母之寵佑，則汝之神形，俱可沾其福澤。病者忻然願領，卽求入會，祇承聖衣。然異哉，病者甫佩聖衣，便見其病立刻全愈，起身下榻，而謝聖母聖衣，錫斯顯佑之洪恩，傳之於眾焉。

又是時是地，有一室女，爲邪所迷，癲狂不止，以致將伊緊緊繫之於室中，恐其出以害人。斯女之母，心甚苦之，百計求痊，魔總不退，因請本會神父以援其難。此時神父一進其室，見此瘋女怖悸，卽發狂狀，面厲目瞋，白沫唇動齒切，



視者皆畏，惟神父伏求天主，托聖母庇佑，以顯其慈能；乞畢乃近瘋女，將聖母聖衣佩他身上。然一佩上聖衣，又奇哉，此瘋狂之女，立見其安寧，若無疾者焉。親隣人共睹之，無不忻喜，爲之感謝聖母聖衣，顯其立退邪魔之能力也。維時神父猶叮嚀此室女，須時感念聖母仁惠，以虔誠常佩聖衣，萬勿輕忽。不料日久，此女忽失去聖衣，而瘋病又復發焉；其母無法治之，只得又去告知神父，請神父至。見其果失去聖衣，因又與之聖衣佩上。但見此女病又立愈。如此者三次，無不嚮應。神父乃痛責其輕忽，致失聖母恩佑，以後務必敬慎，常佩聖衣，免招魔害云云。此女亦不勝痛悔，甚感聖母聖衣恩佑，矢志從是一定恒佩聖衣，斷不敢輕忽，致失恩佑。後來果如所許，獲聖衣之功效，彼邪魔永退，其女之病，終不發焉。

### 聖母聖衣顯其能免劍戟與銃炮之傷

意大里亞國中，罷都亞府，昔有一少年人，溺於邪僻，惡行日進，無所不爲，但不知悔改，惟自以爲罪無可解，竟自失其永福之望，以致墮入魔計，自怨自恨，鎖在屋中，解去衣服，用利刃自己刺其心胸。但此少年人，雖將身上衣服解去，而聖母聖衣尙未解棄，猶在其身。故彼雖用力刺殺，幸有聖衣之庇護，其心胸竟弗受傷。似此卽當感悟；奈彼少年人，不知聖衣之保佑，乃復加力刺之；豈知彼執之利刃，旋又灣軟如蠟，究弗能傷；彼猶不悟，乃舉念改刑以自害；幸蒙聖母終不忍棄之，乃破其迷，牖其衷；彼少年人始自悔悟，乃知聖衣之庇佑，是不忍其神形自落於永苦，不勝感激，不勝痛悔，急奔入堂告解前罪。從此改惡遷善，時時切念聖母聖衣之恩，不絕其口以稱揚之。

又有一武士，臨陣時勇敢不畏凶險，惟仗聖母聖衣之庇佑。一日，正對敵打仗時，見炮子迎面衝來，彼則急求聖母恩佑，果見此炮子旋若無力進前，但落於其足下止焉。武士見此奇跡，伏叩合掌，甚感聖母聖衣之蔭庇，真莫大之能力焉。然亦因其有重罪未解，故聖母垂救之，俾得免神形之永殃也。

### 聖母聖衣顯賜絞犯不死之恩

天主降生後一千六百六十六年，拂郎濟亞國有一卒與人賭錢，被同賭之人觸詈。卒初忍辱容讓；奈同賭者恨猶不已，直揮刀砍之。斯卒見其欲傷己命，亦忙拔劍捍格；不意誤擊殺之。時捕役見其傷人，遂將卒擒住送官；官斷斯卒抵償，三日之後，按法定絞。是時有一賢婦，素行哀矜之功，凡遇繫獄定死罪者，斯賢婦必入獄中勸其告解，以免身後永殃；見斯卒擬絞，不但勸其

悔解，且囑其入聖衣會，懇求聖母助善其終，以至天域。犯卒聞其勸諭，無不樂從，卽悔解己罪，又虔領聖衣，切望聖母扶佑。乃至瞻禮六日，官命刑役將犯卒懸綁在架上，罄力連絞三次；見其已死，猶俟過三刻，刑役欲解厥繩，不料其繩竟忽自斷，而屍亦自墜下，其頭撞地，破裂更多。刑役又將其屍拴在馬後，隨馬拉跑，曳之數里，始將其屍棄之溝壑。當時見之者，無不嘆彼絞死之後，其屍首骨肉又被殘傷至此，慘矣哉！斯卒之死也，豈知逾三個時辰，有犯卒同伴二人，正往收葬其屍，途遇客人告之曰：我見絞犯屍棄於溝，尙未致死，適見其身首猶自活動焉。斯二人聞此信，卽忙步前行，及至其處，果見其未死，因卽抬其隣近房舍扶救之；未幾斯絞卒竟自甦醒。眾又言其已服重刑絞死，卒猶未信；令其用鏡照之，乃見頸上果有絞痕，卒始信之。又逾兩

日，奉聖神降臨瞻禮入堂，共見斯卒身力復舊，所受殘傷悉愈。卒乃知聖母聖衣，垂救其不死之恩，至重至渥也。厥後勸其入會之賢婦，又將斯卒送至司教前，請命核實其得不死之故，皆聖母聖衣之恩。時有主教三位，卽同訊之，問其何修而得聖母之恩佑？若是卒答曰：非我之功，全賴聖母仁慈，賜聖衣之奇能保護耳。因我當日入聖衣會時，誠心托賴聖母提拔，虔誦天主經與聖母經七端，謹循會規；我此時便見聖母抱耶穌臨格，顯容以慰予曰：汝雖擬絞刑，但汝毋庸慮也，余必護汝救汝，决不令汝死於刑下也。我因仗賴聖母聖衣恩佑，忤往法場，毫無疑慮，亦屢次告知吏役不能死我之故。及至身受絞刑，並諸般殘傷，亦無疼痛，並不覺有其苦焉。當時司教者訊明確據，無不爲之稱揚，感謝聖母，遂令書之於冊，垂諸後世，以證聖母賜聖衣之恩。

澤於無窮也。

### 聖母聖衣顯賜死者復生補解其罪以獲善終

前一載意斯把你亞國海船上有聖衣會一友，聖名安多尼忽構病垂危，卽忙請神父告解，未時而逝。論海船上治喪之禮，不便令屍入柩，惟念殮布經後，則裹以白布，放守一晝夜，便將其屍投擯於海，若行瘞焉而已。故斯會友安多尼死於船上，其瘞法亦然。惟其屍放守一宿，至半夜間，看守者忽聞有呼神父者，聽其聲，知係死者之聲，乃急請神父來看。神父至前，問其死者何需？死者答云：我幸蒙天主仁慈，聖母解救，故命我復活以全悔解之功，望神父容我解罪。神父又問，汝非昨日臨終時告解，而領解救之恩者乎？死者曰：我雖解罪，奈省察不及詳細，致忘記了有一重罪，未及悔解，被主嚴判，幾罹

永獄，全賴本會慈母力爲解救；又具述我在世敬慕諸功，守四六七日清齋，每日誦聖母經數端，二十年來，虔佩聖衣，並無輕忽；爲我再三求吾主耶穌，恕我之弱行，赦我之罪犯，乃蒙耶穌允之，賜我復活以告我之重罪。維時神父卽令其解罪赦之，俾承聖母之恩佑；然神工甫畢，遂不言動，泰然而逝。

### 聖母聖衣顯賜救拔當受永罰罪人

曩者意大里亞國，文厄濟亞府，有名族世家一人，因迷於世俗，習惡日深，愈趨愈下，致成兇惡之徒，污穢不堪。其師深嘆惜之，每施神訓，冀其悔悟；豈知言提其耳，左入右出，總不能稍動其心；一若其身陷於深阱之中，欲出不能一樣；是其師亦無如之何矣。惟幸此兇徒，其體恒佩聖衣，未曾離棄，故終得聖母仁慈以救脫之。一日，此兇徒將臥時，忽見魔羣現形，滿載一室，其猙獰

怪狀，甚醜且惡。兇徒一見，則驚惶無措。又見一魔，具述其一生罪犯，甚重甚多；又謂其將來定受永刑，萬難逃出冥獄；如此云云。兇徒聞言，由不得心膽皆顫，毛髮悚然，驚嚇不已，無處逃避。乃見壁上懸着一幅苦像，兇徒急忙望近親之，自念彼魔被我親着苦像，必然懼退釋放於我。嗚呼！豈知吾主苦像竟不容其親近，反背面向之。斯時兇徒被主明顯擯棄其若是，幾至失望，不復再求；旋又念及己身尙佩聖衣，乃聖母所賜者，不如急叩聖母以救我也。乃哀告而言曰：瑪利亞，爾乃我本會慈悲之母，又爲兆民之主保，爲罪犯者之歸宿；爾今明鑒我危急至此，神形將亡，胡弗救予？論我罪重，理宜受罰；但求看我所佩聖衣，賜所許之寵佑，代爲祈主，以息主怒；我自今誓改前非，斷不敢再犯；萬望吾母格外垂憐，允我所求，速速救予。如此哀禱，果見羣魔悉



退。由是兇徒亦卽感悟，速求解罪，痛悔甚切。其後果如所許，悉滌夙染，補贖往日罪犯，終其身以建功德。始則爲一郡之罪魁，而終却成舉國之善士。可知聖母聖衣救拔之恩，其響應之速有如此也。

以上皆近世所顯聖衣之聖跡，特萬千中述其一二耳。今又揭古昔時聖衣之聖跡，於千百中，亦述其一，以證斯會之聖衣，自古至今以至末世，無有不顯其恩佑，施其聖跡者也。

當年西滿聖人，蒙聖母親賜聖衣，躬佩聖衣之後，值昂里亞國有世家一人，因聚非義之財，其貪心益熾，惟利是圖，故惡情種種，以成罪惡之魁。一旦，病篤將逝，其兄勸之悔解，彼竟失望弗聽。厥兄憂極，因急赴西滿聖人之前，陳說其弟垂危失望之險，懇求聖人往救之。聖人乃至其家，一入病室，見病者

神色大變，明露兇死之狀。聖人乃將聖衣安放病者身上，心中懇求聖母，轉求天主，開其明司，豁其茅塞，俾得受其悔解神赦之恩，免其陷於鬼魔之手。正祈禱間，忽見病危者復甦，其身體亦立時強壯，若無病者焉。且自捧持聖衣，畫十字聖號，不勝感嘆而言曰：殆哉！吾迷犯無數重罪，遠勝海滴，卽受冥獄諸刑，亦不足以稱所犯，幸蒙天主至仁至慈，無罪不赦，又仗賴聖母代爲轉求，使我獲蒙赦罪洪恩，我何幸哉！因卽求聖人聽其解罪。旣畢，又請眾人爲證，明燬魔券，斷其妖術，甚恨一生罪惡，又親立遺囑，命後人代補其所聚非義之財；未幾以獲善終。但伊死後，其兄猶慮其弟未得善生，恐其終時之痛泣，未必能滅獄火之炎威；正疑慮間，幸見其亡弟，忽現其形以慰之曰：吾兄勿憂，死後我靈之安，皆聖母聖衣之福力，俾得脫於魔手，以免永殃，而今

已獲登天國之福岸矣。

### 述聖母隆寵聖衣會格外恩證

余謂聖母聖愛，於斯會獨顯其至情，因其格外常示愛之之據，尤有足述者。如當年德肋撒聖女，一日，正祈禱聖母庇佑時，幸蒙聖母開其神目，令其見聖母大張所衣寶衣，其內乃包涵古今多會。聖女一一視之，但不見其中有聖衣會。聖女心懷憂悶，不知何故不見。乃蒙聖母以手指其心，謂聖女曰：在斯在斯。聖女聞之甚喜，益知聖母愛斯會，果心焉愛之，非若愛他會之愛也。然所謂心乎愛者，自必恒圖以悅其所愛者之心，於內外無不願其互相肖似也。所以本會友所服修衣，亦屢見聖母顯其躬自服之，與斯會友若一。此其故，蓋聖母明顯其外服相同，俾斯會友感其心愛倍切也。故當日斯會中

賢友，聚在一室念經之時，曾蒙聖母親臨，將奇美鮮花，一一散與會友，降福而去。又當日諸會友一同飲饌時，忽見聖母亦從中服事，親手傳遞菜蔬，明顯其愛之如弟如子；不獨令其神受神佑，卽形身亦顯其愛養之至焉。如亞爾伯兒鐸係本會聖人，當日患病時，亦蒙聖母降臨其榻，親手饋之以藥。又多明我本會德士，亦曾蒙聖母殊寵，親手取乳，乳之。又當年本會友遵會長命，皆出會院到葡萄林，習行苦工時，乃蒙聖母降臨，以其潔悅，親拭會友之汗。然此皆聖母顯其愛斯會友於獨修之地，豈知聖母尤欲大顯其愛斯會於諸會眾友之前。斯據在當年滿伯列海邊名郡，立有炮臺一座，內供諸般聖物；因海水泛溢，致炮臺衝壞，而聖物亦皆分散於地。事聞於主教堂內諸位司祭者，卽忙至其地，共想收其聖物；見地上苦木一片，四面射光，司祭者

急伸手取之。奇哉斯聖物，竟自翩翩遠颺，若明顯示不容其收去之狀；故彼司祭終弗得之。繼又有他堂司祭者，及各會友亦希冀收其聖物，及至取之，亦俱不得遂其所望。如是者數次，總無有能收其聖物者。豈知乃於是夕，吾本會友，蒙聖母顯諭之曰：彼地未收之聖物，余欲吾弟前往，將吾子之苦木以收之。本會友承斯恩諭，於詰朝合會諸友，齊赴其地，敬收其聖木，果如所諭，敬捧以歸，供奉於本會堂內，迄今猶存之焉。嗟嗟！以上種種殊恩異寵，豈本會所敢希冀而倖獲之耶？實聖母心切愛之，故不獨令本會感其恩施格外，尤願聖教諸會咸知其愛斯會有獨摯也。又不獨令諸會咸知聖衣會爲聖母所深愛，卽凡有愛敬斯會之人，聖母亦不忍棄之，亦曾顯爲聖母所愛，以證其愛斯會之心獨切切也。當年有一富商，買得回國一人以爲僕，其僕

雖信從異端，未歸正教，但伊愛待本會友之情甚重。每見本會友造其主戶，伊卽發其愛情，若自有財物必贈之；或無，則必爲之代乞其主以周濟之。後其僕因殺傷人命，依法論絞監候。本會修士一聞其事，念其素日愛敬本會之情，深爲惜之；因往獄中看望其僕，並力勸其痛悔奉教，以免死後永殃。再三苦勸，彼竟弗從。至將受絞之前四日，其僕夜臥間，忽聞有呼其名者曰：汝寤起兮，余將示汝應行之道兮。斯僕驚醒，卽起身視之，乃見一美女身衣白衣，鮮潔異常，開言以慰之曰：汝起勿慮，吾寧爾也。斯僕卽問主母爲誰乎？聖母答曰：吾乃聖衣會之慈母，汝素愛敬之修士，卽吾子也；吾因鑒汝向有資助吾子之功，故特降來救汝，汝務求領洗以入聖教，死後方得享永福之報也。斯僕面聆聖訓，猶自迷惑，不求歸正。幸聖母仁慈終不棄之，又於是夕顯

容訓之，僕乃覺心目頓豁，願歸正教。於次日卽求領洗。但欲從聖教者，必先令其習學要理經言，方准領洗。故傳教修士囑其先行習學，後始准行。豈知斯僕已洞徹要理，熟習經文，如先習學熟的一般。修士聞之，大爲驚喜，知其必蒙聖母特恩，而已默啓之者，卽許其領洗入教。但斯僕猶感聖母靈惠，求賜其死後瘞於聖衣會聖堂之隅。眾知斯僕，是爲聖母所愛施多恩者，惟俟其絞決後，合郡臣民，皆爭送厥柩而瘞之聖堂焉。可知聖母特寵斯會之誠切，不獨親愛吾友如子如弟，恒加恩佑，尙施恩於愛敬吾會友者，有如是之明證也。

### 歷代教皇特頒聖衣會恩赦

論聖教中諸會，無有不被教皇恩赦者；獨吾聖衣會傳行於天下，列代教皇，

屢見聖母異寵斯會之恩，至重至大，固無不願仰承聖母之所愛者愛之；或頻降褒章以旌表之，或特賜神恩以寵錫之。遡古今教宗之恩詔，以彰著斯會之貴，蓋種種不一，烏能盡述。惟蒙准爲聖母昆弟之尊稱，許本會奉之爲號；又蒙恩施於各會各友，有稱斯會友爲聖母之昆弟者，亦准其人得三年之恩赦；卽此足徵其教宗尊寵斯會之意，勝於他會萬萬矣；亦卽此可知斯會之尊親高貴等妙，於斯名稱無所不包也。所以斯會仰蒙諸位教皇頒行恩赦，不堪枚舉，惟揭其緊要而易記念者，列之於後，俾諸友咸知入斯會，大有無窮之裨益焉。

一、凡教友進會之日，真心痛悔告解領聖體，併按教皇之意，誦經求主，得全大赦。



一、每年總會期，至本堂告解領聖體，念天主經聖母經各七遍，真切懇求天主，恩賜聖教廣揚，異端消滅，並求爲教中帝王諸侯太平和睦，及協持聖教諸艱，得全大赦。

一、每月會期定於第二主日，凡會友至本堂告解領聖體，同行遊會，熱心念經，照上祈求，得全大赦。

一、本會友，倘有大故，課期不便至本堂行會者，真心痛悔，在別堂告解請聖體，本日日未沒之前，到本會堂來，照上念經祈禱，亦得全赦。

一、病者，繫獄者，行旅者，或婦女們實不能至本堂行會，若遇會期，能誠心念聖母小日課，或天主經聖母經各五十遍，併真心爲愛天主萬有之上痛悔己罪，定志遇便卽行告解領聖體，亦得全赦。

一、凡會友遇臨終時，真心悔解，請聖體，口誦耶穌瑪利亞聖名，或口不能誦而心內念者，皆得全赦。

一、凡會友於課期外，遇別日，至本堂行告解領聖體，誠心念經，照上祈求者，每月一次，亦得五年又五次四十日之恩赦。

一、每年值聖母不拘何瞻禮，至本堂告解請聖體，併熱心念經照上祈求者，每一次得三年又三次四十日之赦。

一、每逢瞻禮四，守小齋，每一日得三百日之赦。

一、凡會友爲亡者送殯到墳，不論其在會與否，但爲伊念經求天主寬煉其罪，早賜天國，每一次亦得一百日之恩赦。

一、每念聖母小日課，每一次得一百日之赦。

一，凡會友在本堂與彌撒，每一次得百日之赦。

一，凡會友遇貧窮者行哀矜，每一次得百日之赦。

一，凡會友遇有臨險將犯罪者，而能救其免陷於凶惡，每一次得百日之赦。

一，凡會友願與人真實和睦，或喜勸他人亦相和睦者，每一次得百日之赦。

一，凡會友引導人爲善，或講道勸人棄邪歸正者，每一次得百日之赦。

一，凡會友遇有不明當知之要理者，教之使其明白，再或行各樣形神愛人  
之功，或克己之事，每次得百日之赦。

一，凡會友恭敬聖母七樂，念天主經聖母經各七遍，每日得四十日之赦。

以上諸條恩赦，欽承格肋孟德第十位教皇恩准，賜在聖衣會者，凡得  
此神恩，若願讓與煉靈，卽每全大赦，便能救一煉靈升天。

又西斯篤第五位教皇，准本會修士奏請，施三百日之恩赦，於念聖號禱文者。

又念聖母禱文者，亦得二百日之恩赦。

又每人心口誦耶穌與瑪利亞聖名者，每次可得五十日之恩赦。

又格肋孟德第七位教皇，恩准施在會者，臨終之時，請本會神父，念本會所定免罪經文，因其愛天主，真心痛悔一生罪犯，不但能獲其罪之赦，尙免其當受煉獄諸罰，且使其靈魂復潔，亦如領洗之嬰兒一般。可知在斯會之友，若得斯恩赦以亡，必免其入煉獄，俾之直升天堂。

又奉保祿第五位教皇，加增本會格外神恩，寬免本會友親身到羅瑪府，以得七大堂大赦；但在本會堂內依規誦經，亦准其得七大堂之大赦，若赴

羅瑪府一焉。

如耶穌聖誕前四個主日，併前日及連耶穌聖誕後四個瞻禮，立耶穌聖名，三王來朝，四季小齋十二日，封齋前三個主日，併本日及封齋起至復活後第一主日內各日，耶穌升天前三日，併升天本日，聖神降臨後八日。

以上照所定之日，凡在會者，按期念天主經聖母經各七遍，每日俱得大赦。此外聖衣會所蒙各種恩赦甚多，恐會友不能悉記，故不多述。惟曰在會者，既與會中精修之士，共成一體，則修會各種之恩赦，在會者俱能相通功，無間無阻，可知之矣，又何言哉？

### 受業儀注

一、惟此聖母會，既蒙天主簡選，以宣天主及聖母之尊榮，則入斯會者，欽崇天主後，孰不當虔切以敬愛聖母爲首功乎？若願進斯會，或其人素不守奉教之本分，及不定其恒心，敬愛聖母一如親母者，必不可准其隸於聖母昆弟之會。故求入斯會之人，本會有專司其任者，務必考其外表實行，果能無忝於聖母之昆弟，始准其先報姓名，令其明斯會之寶貴，學習會規，保守三個月，然後回明神父；至月課之期，准其受業。

一、當念天主仁愛無盡，緣降生受死以贖罪人，可見其哀矜之至，決不輕棄罪人；悔則赦，歸則受，其恩章章也。故吾人既承主命，法主仁愛，自當體主哀憐罪人之心，而亦不忍輕忽罪人。惟察其真切痛悔往非，實願改遷之據，則准其入聖母聖衣會，誠爲至當。況吾聖母蒙天主立爲罪犯者之歸

宿，又爲斯會之主保，罪人旣願歸托聖母，以進斯恩會，可知仁慈之母，卽施恩佑於其友也，有必然者。故斯會不吐棄罪人，歸斯受之，更爲分所當然。但容其入會，先學守會規，最少必俟半載，還要詳加考察其欽崇天主及愛慕聖母之確據，如果真誠，外無壞表，始可回明神父定奪。

一當知進斯會之時，便成聖母之子，又爲聖母之弟，其恩匪淺鮮也。故凡願入會者，務期靈魂清潔，無絲毫污穢，方可入斯會，望至貞之母爲之慈母，以仰承聖母所許之洪恩也。然當於受業之前數日，自洗心滌慮，將從前念言行缺，詳細查察；凡有所犯，真切痛悔；至受業之日，全解歷來之過犯，定改前罪，祇承彌撒大恩，虔領聖體至愛，謝主無限之恩。

一，每月會期，彌撒旣畢，俱當默念，想聖母七樂，念天主經聖母經各七遍。若

有入會之人，司事者於彌撒後，將伊引至聖母臺前，跪俟神父賜佩聖衣。此時宜想我大罪人，何幸得如是隆恩，躬佩聖母從天親賜之聖衣，而容我魔奴，得陟聖母至尊之子位也。見神父降福成會之禮畢，卽當稽首伏地拜謝，以申其感佩無已之心。

### 修業總規

聖母之恩，施於斯會，極大極繁，而超軼恒格者，其獨爲斯會之慈母，又獨視斯會友爲之子，以顯其愛之至耳。故吾友亦當以愛酬其愛，而事之如母，以敬承其所許之洪恩，斯無忝於斯會之友也。況存酬愛之心，不去諸懷，則守斯會之規，雖覺其難，亦必然坦夷無阻。苟弗坦夷，心必無愛，可知之矣；不然，斯會規簡約，守之不畏其難，感聖母之愛，酬之惟恐其後，豈猶有弗坦弗夷



之理哉？且斯會規從簡之故，又皆緣聖母惠愛吾友如子，不忍令其子肩負重輓者也。所以其任輕矣，飴矣；其善守之報，則高矣，大矣。吾友一心仰酬聖母之愛，願承聖母所許天國之恩，則分宜矢竭微誠，恪遵規範，萬萬不可忽諸。茲余將斯會簡約規則列之於後，示我同人。

一、會友受業之後，既知聖衣爲得眾恩之印證，於吾人神形，大有裨益，則當常佩於身，晝夜不離。不拘何人，或童男室女，或夫婦同居，皆謹佩之，勿令離身；但宜帶於肩背之上；因其原文謂之肩衣，亦當虔心善佩，視爲寶貴，不可輕忽。如當年有第十一位教皇名良者，當其卽位之時，更教皇之寶衣，其左右大臣，見教皇身佩聖衣，意欲去之；豈知教皇不肯，乃卽止之而言曰：勿棄聖母，俾聖母不棄於吾。蓋言若去吾佩之聖衣，恐聖母所許之

神佑亦棄吾也。由此觀之，可見聖衣萬萬不可輕棄；若日久損壞，卽各自另製一件，不必再聖可也。

二，哀痛歡慶，俱爲愛心之驗；如憂父母之憂者，而不樂父母之樂，是非孝子之道也。今哀痛聖母之苦，原係七苦會之本業；而喜慶聖母之樂，是乃本會之要務。因聖母所賜之聖衣，亦謂喜樂聖衣。故在斯會之友，旣特承聖母賜爲其子，理當發其愛母之心，常想聖母之樂，每日加念天主經聖母經各七遍，爲恭慶聖母之七樂焉。

三，會友於公齋外，宜加持瞻禮四之小齋；若瞻禮四之日，遇耶穌聖誕瞻禮，則此日之齋免守可也。再或有他故不能守瞻禮四之齋，亦必要先回明本會神父，另加神功，以補斯缺；萬勿自恃己見，致悞聖母所許死後必救

煉靈之恩。當年有亞立山第七位教宗，因其登位之日，乃瞻禮四齋期，論此日登位，理宜大慶賀，而教皇不顧其慶賀，依然守其齋戒；雖有眾臣奉勸從權，皆弗聽。可見斯瞻禮四之齋，教皇謹守，尙且如是；吾友豈可推諉托故而輕忽之哉？

四，聖母乃卒世童貞至潔之母，可知甚悅聖母之心者，莫如形神之清潔，一如聖母之貞焉。亦可知甚惡聖母之心者，無過身心之污穢，一如惡魔之醜焉。故吾會友須知聖母所許聖衣之洪恩，又卽自立聖規，其內首定保潔爲上，或守童貞，或鰥寡貞，或夫婦貞，總要吾友務期內情清潔，外表端方，斯乃修業之人，可以悅聖母之心，獲其福寵，而沾其聖衣之洪恩也。不然，身心不潔，卽躬佩聖衣，冀得聖衣之寵佑，不其難哉？吾友其慎之可也！

以上四規範，乃吾友進德修業之要務，亦卽爲受寵沾恩之具者也。其餘規則無關緊要，故不多贅。

### 聖母七樂

- 一，預聞天神福報，及聖子降孕。慶賀聖母一樂，念天主經聖母經各一遍。
- 二，耶穌聖誕，乃人受福之首日。慶賀聖母二樂，念天主經聖母經各一遍。
- 三，三聖王遠來朝拜，不約偕來。慶賀聖母三樂，念天主經聖母經各一遍。
- 四，憂覓耶穌，喜見講道於聖殿。慶賀聖母四樂，念天主經聖母經各一遍。
- 五，耶穌復活，明證受難之甘心。慶賀聖母五樂，念天主經聖母經各一遍。
- 六，自耶穌升天，始開永福之路。慶賀聖母六樂，念天主經聖母經各一遍。
- 七，仰望降臨，荷蒙聖神之寵佑。慶賀聖母七樂，念天主經聖母經各一遍。

跋

蒙聖母賜爲子弟之稱，斯會固已極其尊貴；謝聖母許救煉靈之旨，此恩又莫比之高深。要知斯會獲斯恩寵，誠非一日之功而得之者。蓋本會積二千餘載之勞績，乃蒙聖母賜許，是豈僥倖而獲之哉？故知斯會聖衣之恩，最重最大；卽萃古今賢聖之稱頌，亦未能寫其萬一也。但吾友旣承聖母之所賜，無不願承聖母之所許；然願承聖母之所許，必先求仰合聖母之聖意；須知聖意無他，惟望吾友遠惡進善，踐其所約，以祇承聖母所許之洪恩已耳。余於是切望吾友，勤去宿惡，日進於善。每逢聖母諸瞻禮之日，務行滌罪神工，以合聖母之意，以樂聖母之心；斯真爲吾友之急務也。然於是日之前，卽宜苦其身，節其慾，持齋克己，務竭微悃，以特表愛慕至切之情。又自定恒其心，

一其志，循規踐約，分外加功，以圖報恩，許無窮之福。以故吾友當恒念額我  
畧聖師所云：受恩愈多，爾責愈重；加功圖報，猶恐弗及；若謂我心懷信望，言  
讚謝，體叩拜，而行或不逮，斯則奉教之名有玷，尙可以言其爲聖母之子乎？  
不爲其子，尙可望聖母所許之洪恩乎？嗟嗟！妄矣！妄矣！昔德肋撒聖女亦曾  
囑吾友曰：吾儕躬佩聖衣者，蒙聖母特爲慈母；須知恩重宜謝，則聖母之寵  
佑可望；若徒躬佩聖衣，倚爲之子，而不盡其子道，則名實不稱，何益之有？惟  
實踐母踪，謹毀其聖德，畏主盡職，斯不負聖母特賜聖衣爲升天之質矣！吾  
友其重念之哉！其善佩之哉！勉之勉之！

24  
175233